

Mchungaji Mwema

Mimi ndimi mchungaji mwema. Mchungaji mwema huutoa uhai wake kwa ajili ya kondoo—Yohana 10:11.

Yesu ... anajifanisha Mwenyewe na mchungaji. Mimi ndimi mchungaji mwema,” anatangaza, “Mchungaji mwema huutoa uhai wake kwa ajili ya kondoo.” “Mimi ndimi mchungaji mwema; nao walio wangu nawajua; nao walio wangu wanijua mimi; kama vile Baba anijuavyo, nami nimjuavyo Baba. Nami nautoa uhai wangu kwa ajili ya kondoo” (Yohana 10:11, 14, 15).

Kama ambavyo mchungaji wa kidunia anajua kondoo wake, ndivyo ambavyo Mchungaji wa kimbingu anajua kondoo Wake ambao wametawanyika ulimwenguni kote. “Na ninyi, kondoo zangu, kondoo za malisho yangu, ni wanadamu, na mimi ni Mungu wenu, asema Bwana MUNGU” (Ezekieli 34:31).

Katika mfano wa kondoo aliyepotea, mchungaji anatoka kwenda kutafuta kondoo mmoja—namba ndogo kabisa katika hesabu. Akiwa amegundua kwamba kondoo wake mmoja amepotea, haangalii kwa kutokujali kutokana na kondoo ambao wako zizini salama, na kusema, ninao tisini na kenda, na itanigharimu mateso mengi sana kwenda kumtafuta huyu mmoja aliyepotea. Hebu na arudi, nami nitafungua mlango wa zizi na kumruhusu aingie. La; punde tu kondoo anapopotea ndipo mchungaji anajawa na huzuni na wasiwasi. Akiwaacha wale tisini na kenda zizini, anakwenda kumtafuta yule mmoja aliyepotea. Hata kukiwa ni giza na dhoroa ya usiku, hata njia iwe ya hatari na isiyo na uhakika, hata kama utafutaji utakuwa ni mrefu na wa kuchosha, yeye hachoki hadi yule aliyepotea apatikane.

Ni faraja iliyoje anaposikia kwa mbali kilio chake cha kwanza hafifu! Akiifuatia sauti, anapanda mwinuko mkali wa kilele kirefu; anaenda kwenye ukingo wa mwinuko huo, kwa kuhatarisha maisha yake mwenyewe. Hivyo anatafuta huku kilio, kikizidi kupungua, kikimwashiria kwamba kondoo wake anakaribia kufa.

Na anapomwona yule kondoo aliyepotea, je, anamwamuru kumfuata? ... La; anamlaza kondoo aliyechoka mabegani mwake, na kwa shukurani za uchangamfu kwamba utafutaji wake haukuwa wa bure, anarudi kundini. Shukurani zake huoneshwa katika nyimbo za shangwe. Na “afikapo nyumbani kwake, huwaita rafiki zake na jirani zake, akawaambia, Furahini pamoja nami, kwa kuwa nimekwisha kumpata kondoo wangu aliyepotea” (Luka 15:6).

Kwa Mchungaji Mwema anapompata huyo mwenye dhambi aliyepotea, mbingu na nchi zinaungana katika kufurahi na kutoa shukurani. Kwa maana “kutakuwa na furaha mbinguni kwa ajili ya mwenye dhambi mmoja atubuye, kuliko kwa ajili ya wenye haki tisini na kenda ambao hawana haja ya kutubu” (aya ya 7) (Gospel Workers, 181, 182).

Katika kazi yetu, juhudi za mtu binafsi zinaweza kukamilisha mengi zaidi ya vile tunavyoweza kudhania. Ni kwa sababu ya kukosekana kwa juhudi hizi, ndiyo maana roho zinaangamia. Roho moja ni ya thamani ya umilele; Kalvari hubainisha thamani yake. Roho moja iliyoongolewa kwa Yesu itakuwa chombo katika kuongoa wengine, na kisha kutakuwa na matokeo yanayoongezeka daima ya Baraka na wokovu (Gospel Workers, 184).